

Na osnovu člana 8. i 23. Zakona o ministarstvima i drugim organima uprave Tuzlanskog kantona-prečišćeni tekst ("Službene novine Tuzlanskog kantona" broj: 10/18 i 5/24) i člana 14a. stav (2) Zakona o osnovnom odgoju i obrazovanju-prečišćeni tekst („Službene novine Tuzlanskog kantona“, br. 10/20, 8/21, 11/21, 22/21, 5/22, 10/22, 11/22, 9/23-presuda US FBiH, 12/23 i 5/25), ministar obrazovanja i nauke Tuzlanskog kantona donosi

O D L U K U

o utvrđivanju uslova i kriterija za stipendiranje učenika sa invaliditetom u osnovnim školama na području Tuzlanskog kantona u školskoj 2025/2026. godini

I - OPĆE ODREDBE

Član 1.

(Predmet)

Ovom odlukom utvrđuju se uslovi i kriteriji za stipendiranje učenika sa invaliditetom u osnovnim školama na području Tuzlanskog kantona u školskoj 2025/2026. godini.

Član 2.

(Korisnici prava)

Pravo na dodjelu stipendije po ovoj odluci imaju učenici sa invaliditetom u osnovnim školama na području Tuzlanskog kantona po osnovu: općeg uspjeha postignutog u prethodnoj školskoj godini u smislu završenog razreda osnovne škole i stepena invalidnosti, koji se obrazuju i redovno pohađaju osnovnu školu na području Tuzlanskog kantona u školskoj 2025/2026. godini (u daljem tekstu: kandidat).

Član 3.

(Finansijska sredstva)

(1) Finansijska sredstva za dodjelu stipendija osigurana su u Budžetu Tuzlanskog kantona za 2025. godinu na budžetskoj poziciji Ministarstva obrazovanje i nauke 24010018, ekonomski kod 614200 – tekući transferi pojedincima (subanalitika OAD 200).

(2) Stipendija može biti dodijeljena jednokratno ili u više mjesečnih rata, zavisno od planiranih i raspoloživih sredstava u Budžetu, što se bliže određuje ugovorom iz člana 15. ove odluke.

Član 4.

(Visina stipendije)

Ukupna visina stipendije, po jednom kandidatu, i ukupan broj stipendija i način isplate stipendija utvrdit će se posebnom Odlukom ministra obrazovanja i nauke Tuzlanskog kantona (u daljem tekstu: ministar).

II - USLOVI ZA DODJELU STIPENDIJA

Član 5.

(Uslovi za dodjelu stipendije)

Pravo na dodjelu stipendije ima kandidat pod uslovom:

- a) da je državljanin Bosne i Hercegovine,
- b) da ne koristi ili nije dobitnik neke druge stipendije iz Budžeta Tuzlanskog kantona,
- c) da je redovan učenik osnovne škole na području Tuzlanskog kantona i da redovno pohađa nastavu u školskoj 2025/2026. godini,

- d) da ima status lica sa invaliditetom.

III - KRITERIJI ZA DODJELU STIPENDIJA

Član 6.

(Kriteriji za dodjelu stipendija)

Rangiranje kandidata za dodjelu stipendije vrši se na osnovu sljedećih kriterija:

- a) opći uspjeh postignut u prethodnoj školskoj godini u smislu završenog razreda osnovne škole,
- b) stepen invalidnosti,
- c) učešće na takmičenjima.

Član 7.

(Bodovanje po osnovu ostvarenog uspjeha u prethodnoj školskoj godini)

(1) Po osnovu općeg uspjeha postignutog u prethodno završenom razredu osnovne škole kandidatu pripadaju sljedeći bodovi:

- a) odličan uspjeh – prosjek 4,50 do 5,00.....10 bodova
- b) vrlodobar uspjeh – prosjek 4,00 do 4,49..... 9 bodova
- c) vrlodobar uspjeh – prosjek 3,50 do 3,99..... 8 bodova
- d) dobar uspjeh – prosjek 3,00 do 3,49..... 7 bodova
- e) dobar uspjeh – prosjek 2,50 do 2,99.....6 bodova
- f) dovoljan uspjeh – prosjek 2,00 do 2,495 bodova.

(2) Po osnovu općeg uspjeha postignutog u prethodno završenom razredu osnovne škole, ukoliko su ocjene opisne, kandidatu pripadaju sljedeći bodovi:

- a) ističe se.....10 bodova
- b) dobar..... 9 bodova
- c) zadovoljava..... 7 bodova
- d) djelimično zadovoljava..... 5 bodova.

Član 8.

(Bodovanje po osnovu stepena invalidnosti)

Po osnovu stepena invalidnosti kandidatu pripadaju sljedeći bodovi:

- a) stepen invalidnosti od 90 do 100%.....10 bodova
- b) stepen invalidnosti od 80 do 90%..... 9 bodova
- c) stepen invalidnosti od 70 do 80%..... 8 bodova
- d) stepen invalidnosti od 60 do 70 %.....7 bodova
- e) stepen invalidnosti od 50 do 60 %.....6 bodova
- f) stepen invalidnosti od 40 do 50 %.....5 bodova
- g) stepen invalidnosti od 30 do 40 %.....4 boda
- h) stepen invalidnosti od 20 do 30 %.....3 boda
- i) stepen invalidnosti od 10 do 20%.....2 boda.

Član 9.

(Bodovanje po osnovu učešća na takmičenjima)

Po osnovu učešća na takmičenjima u školskoj 2024/2025. godini (takmičenja iz predmeta nastavnog plana i programa, tehničkog i kulturno-umjetničkog stvaralaštva, književnih, likovnih, pozorišnih i muzičkih ostvarenja i iz oblasti sporta na općinskom, kantonalnom, federalnom, državnom i međunarodnom nivou) kandidatu pripadaju sljedeći bodovi:

- a) za osvojeno jedno od prvih tri mjesta na takmičenju..... 5 bodova
- b) za učešće na takmičenju..... 2 boda.

Član 10.

(Prednost pri jednakom broju bodova)

Ukoliko na rang listi dva ili više kandidata ostvare isti broj bodova, prednost na rang listi, odnosno prednost pri dodjeli stipendije, ostvarit će kandidat koji pohađa viši razred.

IV - POSTUPAK DODJELE STIPENDIJA

Član 11.

(Donošenje odluke i raspisivanje konkursa)

(1) Odluku o raspisivanju konkursa za dodjelu stipendija učenicima sa invaliditetom u osnovnim školama na području Tuzlanskog kantona, u školskoj 2025/2026. godinu, donosi Ministarstvo obrazovanja i nauke Tuzlanskog kantona (u daljem tekstu: Ministarstvo).

(2) Tekst konkursa i obrazac prijave na konkurs utvrđuje Ministarstvo.

(3) Konkurs obavezno sadrži sljedeće podatke:

- a) naziv organa koji objavljuje konkurs,
- b) adresu organa kojem se zahtjevi podnose,
- c) uslovi i kriteriji za dodjelu stipendije,
- d) dokazi koje kandidati prilažu uz prijavu na konkurs (dokaz o uspjehu i dokaz o stepenu invalidnosti),
- e) rokovi za prijavu na konkurs,
- f) prava i obaveze kandidata,
- g) način isplate sredstava i
- h) druge eventualno potrebne podatke.

(4) Tekst konkursa se objavljuje na zvaničnoj veb stranici Ministarstva, od kada počinje teći rok za predaju dokumentacije.

Član 12.

(Prijava na konkurs)

(1) Prijave na konkurs sa potrebnom dokumentacijom, podnose se Ministarstvu, u roku od 10 dana od dana objavljivanja konkursa na veb stranici Ministarstva.

(2) Prijava na konkurs se vrši putem prijavnog obrasca, koji se može preuzeti na veb stranici Ministarstva i u službenim prostorijama Ministarstva.

(3) Kandidat je uz popunjen prijavni obrazac obavezan dostaviti i:

- a) uvjerenje o statusu redovnog učenika osnovne škole u školskoj 2025/2026. godini (original ili ovjerena kopija),
- b) uvjerenje o državljanstvu (original ili ovjerena kopija),

c) uvjerenje o prethodno završenom razredu osnovne škole (original ili ovjerena kopija) ili ovjerena kopija učeničke knjižice o posljednjem završenom razredu osnovne škole,

d) ovjerena izjava da kandidat za stipendiju ne koristi ili nije dobitnik neke druge stipendije iz Budžeta Tuzlanskog kantona,

e) nalaz, ocjenu i mišljenje Instituta za medicinsko vještačenje zdravstvenog stanja kojim se utvrđuje postotak invalidnosti (original ili ovjerena kopija).

(4) Pored dokumentacije predviđene u stavu (3) ovog člana, kandidati mogu dostaviti i dokumentaciju (uvjerenja, potvrde, certifikate izdate od strane organizatora takmičenja) kojom se dokazuje učešće i osvojena prva tri mjesta na takmičenjima u svrhu bodovanja u skladu sa članom 9. ove odluke.

(5) Sva dokumentacija koja se dostavlja uz prijavni obrazac mora biti u originalu ili ovjerenj fotografiji, te na jednom od jezika u službenoj upotrebi u Bosni i Hercegovini (uz dokument izdat na stranom jeziku potrebno je dostaviti i originalni prijevod sudskog tumača ili ovjerenu kopiju prijevoda).

Član 13.

(Imenovanje i sastav Komisije)

(1) Konkursnu proceduru provodi Komisija koju imenuje ministar, najkasnije u roku od 3 dana od dana isteka roka za podnošenje prijave na konkurs.

(2) Komisija ima tri člana, imenovana ispred Ministarstva.

(3) Komisija za svoj rad odgovara Ministru.

(4) Članovi Komisije ne mogu biti lica čiji članovi porodičnog domaćinstva učestvuju u postupku za dodjelu sredstava po ovoj odluci.

(5) Komisija je dužna razmotriti prijave u pogledu blagovremenosti i potpunosti, utvrditi broj bodova po svakom od osnova i najkasnije u roku od 10 dana od dana isteka roka za podnošenje prijave na konkurs sačiniti jedinstvenu rang listu i istu objaviti na veb stranici Ministarstva.

(6) Rang lista kandidata obavezno sadrži:

a) prezime, ime jednog roditelja i ime kandidata,

b) broj bodova po svakom od utvrđenih osnova,

c) ukupan broj bodova po svim osnovama i

d) pouku o pravnom lijeku sa tačno naznačenim rokom za ulaganje prigovora.

(7) Neblagovremene i nepotpune prijave Komisija neće uzimati u razmatranje, a prijavljeni kandidati o istom se obavještavaju sačinjavanjem posebne liste.

Član 14.

(Postupak po prigovoru i donošenje konačne rang liste)

(1) Na liste iz člana 13. stavovi (5) i (7) ove odluke, nezadovoljni kandidati mogu podnijeti prigovor u roku od tri dana od dana objavljivanja listi na veb stranici Ministarstva.

(2) Prigovor se podnosi Ministarstvu u pisanoj formi.

(3) O podnesenim prigovorima odlučuje ministar u roku od 5 dana od dana isteka roka za podnošenje prigovora.

(4) Nakon okončanja postupka po prigovorima konačnu rang listu kandidata utvrđuje ministar.

Član 15.

(Ugovor o stipendiranju)

(1) Na osnovu konačne rang liste, ministar sa roditeljem/starateljem kandidata, zaključuje ugovor o stipendiranju, kojim se bliže uređuju međusobna prava i obaveze.

(2) Ugovor iz stava (1) ovog člana zaključuje se u roku od 15 dana od dana isticanja konačnih rang listi na veb stranici Ministarstva.

(3) Ukoliko roditelj/staratelj kandidata, u roku iz stava (1) ovog člana ne potpiše ugovor, kandidat gubi pravo na dodjelu stipendije, a stipendija se dodjeljuje prvom sljedećem kandidatu sa rang liste kandidata koji nije ostvario pravo na dodjelu stipendije.

V – GUBITAK PRAVA NA STIPENDIJU

Član 16.

(Gubitak prava na stipendiranje)

(1) Korisnik stipendije gubi pravo na dalju isplatu stipendije, ako u toku školske godine:

- a) napusti redovno školovanje,
- b) bude mu izrečena disciplinska mjera isključenja iz škole,
- c) po nekom drugom osnovu prestane mu status redovnog učenika,
- d) ako se naknadno utvrdi da su prilikom prijave na konkurs iznesene netačne činjenice na osnovu kojih mu je stipendija dodijeljena.

osnovu kojih mu je stipendija dodijeljena.

(2) Korisnik stipendije je dužan u roku od trideset dana od nastupanja okolnosti iz stava (1) tačka a), b), c) i d) ovog člana, obavijestiti davaoca stipendije o tim okolnostima.

VI – ZAVRŠNE ODREDBE

Član 17.

(Stupanje na snagu Odluke)

Ova odluka stupa na snagu danom donošenja i biće objavljena u „Službenim novinama Tuzlanskog kantona“.

BOSNA I HERCEGOVINA
Federacija Bosne i Hercegovine
TUZLANSKI KANTON
Ministarstvo obrazovanje i nauke
Broj: 10/1-11-034012/25
Tuzla, 12.11.2025. godine

MINISTAR

Dr. sc. Ahmed Omerović, v. r.

**Ministarstvu obrazovanja i nauke Tuzlanskog kantona
Ul.Muhameda Hevaija Uskufija broj 1/III, 75000 Tuzla**

(Ime, ime oca i prezime učenika, adresa i kontakt telefon)

PREDMET: Prijava na konkurs za stipendiranje učenika sa invaliditetom u osnovnim školama na području Tuzlanskog kantona u školskoj 2025/2026. godini

Prijavaljujem se na konkurs za stipendiranje učenika sa invaliditetom u osnovnim školama na području Tuzlanskog kantona u školskoj 2025/2026.godini.

Uz prijavni obrazac dostavljam (zaokružiti):

- a) uvjerenje o statusu redovnog učenika osnovne škole u školskoj 2025/2026. godini (original ili ovjerena kopija),
- b) uvjerenje o državljanstvu (original ili ovjerena kopija),
- c) uvjerenje o prethodno završenom razredu osnovne škole (original ili ovjerena kopija) ili ovjerena kopija učeničke knjižice o posljednjem završenom razredu osnovne škole (stranice na kojima se nalaze podaci o učeniku i podaci o postignutom uspjehu),
- d) ovjerena izjava da kandidat za stipendiju ne koristi ili nije dobitnik neke druge stipendije iz Budžeta Tuzlanskog kantona,
- e) nalaz, ocjena i mišljenje Instituta za medicinsko vještačenje zdravstvenog stanja kojim se utvrđuje postotak invalidnosti (original ili ovjerena kopija),
- f) dokumentacija kojom se dokazuje učešće/osvojena prva tri mjesta na takmičenjima (original ili ovjerena kopija) – ukoliko kandidat istu posjeduje.

U _____ godine

Podnosilac prijave
